

- प्रधानमंत्री नरेन्द्र मोदी पी.एम. गतिशक्ति राष्ट्रीय मास्टर प्लान रा तीन साल पूरा व्हेवण री सरावना करी-योजना ऊं विकसित भारत री परिकल्पना साकार व्हे री है।
- "विश्व मानक दिवस" काले मनायो जायेला-जयपुर मांय व्हेला "मानक महोत्सव" रो आयोजन।
- राज्य मांय न्यारा-न्यारा हादसा मांय चार लोगां री मौत।
- प्रदेश मांय केई ठौड़ां हल्की बिरखा होवण ऊं लोगां ने गर्मी ऊं मिल्यो आराम-आज अर काले दिखणाद अर दक्षिण पूर्वी राजस्थान रा केई जिलां मांय हल्का ऊं मझला दर्जा री बिरखा रा आसार।

000

प्रधानमंत्री नरेन्द्र मोदी प्रधानमंत्री गतिशक्ति राष्ट्रीय मास्टर प्लान रा तीन साल पूरा होवण री सरावना करता कह्यो के ई योजनां ऊं भारत रा आधारभूत ढांचां मांय बदलाव अर सम्पर्क मांय बढ़वार व्ही है, जिण ऊं विकसित भारत री परिकल्पना साकार व्हे री है। एक सोशल मीडिया पोस्ट मांय श्री मोदी कह्यो के गतिशक्ति मल्टी मॉडल कनेक्टिविटी मांय महताऊ बढ़वार करी है अर न्यारा-न्यारा हलकां रा बेगां अर कारगर विकास ने तैय कर्यो है। वणा कह्यो के न्यारा-न्यारा हितधारका रा एकीकरण ऊं संभार तंत्र मजबूत व्हेयो है, देरी मांय कमी आयी है अर घणकरां लोगां सारू नुवां मौका बण्यो है। ध्यानजोग है कि प्रधानमंत्री गतिशक्ति राष्ट्रीय मास्टर प्लान री शुरुआत आज रे ई दिन साल 2021 मांय व्ही ही, इण रो मकसद देश रा बुनियादी ढांचां मांय बदलाव करणो है। जिण ऊं लोगां री आवा-जाही अर चीजां अर सेवावां सारू बे रोक-टोक अर कुशल कनेक्टिविटी दीरायी जा सके। ई योजना मांय 44 केंद्रीय मंत्रालयां अर 36 राज्यां अर केन्द्र शासित प्रदेशां री बुनियादी ढांचां परियोजनावां अर आं ने लागू करणो भेळो है। इस पहल ऊं न्यारा-न्यारा मंत्रालयां री 15 लाख करोड़ रुपयां ऊं बत्ती री 208 मोटी बुनियादी ढांचा परियोजनावां रो आकलन कर ने एक मोटी कामयाबी हासिल करी है।

000

गृह मंत्रालय सगळा केन्द्रीय मेहकमां अर राज्यां अर केन्द्र शासित प्रदेशां रा प्रशासकां ने ई मीना री 24 तारीख ने संयुक्त राष्ट्र दिवस रे मौके सगळा महताऊ भवनां माथे राष्ट्रीय झण्डा रे साथे संयुक्त राष्ट्र रो झण्डो लगावण री अरज करी है। मंत्रालय कानी ऊं काढी ज्या निर्देश मांय कही ज्यो है के राष्ट्रपति भवन, उपराष्ट्रपति रहवास, संसद भवन, सर्वोच्च न्यायालय भवन, राज भवनां, राज निवासां, विधान परिषद भवनां, विधानसभावां अर उच्च न्यायालयां माथे संयुक्त राष्ट्र रो झण्डो नी लगायो जायेला।

000

लोकसभा अध्यक्ष ओम बिरला आज ऊं स्विट्ज़रलैंड रा जिनेवा मांय सरू व्हे री अंतर-संसदीय संघ री 149वीं मीटिंग मांय संसदीय नुमाइन्दा मण्डल री अगुवाई कर रह्यो है। आ मीटिंग 17 अक्टूबर ताई चालेला। एक सोशल मीडिया पोस्ट मांय श्री बिरला बतायो के आप री यात्रा रे दौरान वे "अधिक शांतिपूर्ण और सतत भविष्य के लिए विज्ञान, प्रौद्योगिकी और नवाचार का उपयोग" मुद्दा माथे सभा मांय बोलेला। श्री बिरला बतायो के वे अंतर संसदीय संघ री फैसलो लेवण वाळी शासी परिषद री बैठकां मांय हिस्सो लेवेला। इण रे अलावा वे दूजा देशां री संसदां रा अध्यक्षां ऊं ई मिलेला आप री जातरा रे दौरान श्री बिरला जिनेवा मांय प्रवासी भारतीयां ऊं ई मिलेला। नुमाइन्दा मंडल मांय राज्यसभा रा उपसभापति हरिवंश, दोन्यूं सदनां रा महासचिव अर केई दूजा सांसद भेळा है। अंतर-संसदीय संघ मांय 180 सांसद अर 15 एसोसिएट सदस्य है। इण सदस्य देशां मांय चीन, भारत अर इंडोनेशिया जस्या बड़ा देशा रे अलावा काबो वेर्दे, सैन मैरिनो अर पलाऊ जस्या छोट देश ही भेळा है।

000

"विश्व मानक दिवस" काले मनायो जायेला। ई मौके काले भारतीय मानक ब्यूरो-बीआईएस जयपुर" मांय "मानक महोत्सव" रो आयोजन कर्यो जायेला। ब्यूरो री राजस्थान प्रमुख कनिका कालिया बतायो के विश्व मानक दिवस ने

हर साल 14 अक्टूबर ने वां जाणकारां रो सनमान कर्यो जावे है जो स्वैच्छिक अंतरराष्ट्रीय मानकां ने विकसित करे है। वणा कह्यो के “मानक महोत्सव” मांय सरकारी अहलकारां, मानक क्लब मेंटर्स, रिसोर्स पर्सन, उपभोक्ता संगठनां अर बीआईएस लाइसेंस धारकां रा ठांवां योगदान सारू सनमानित ई कर्या जायेला।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास कड़ी चलायी जा रही है। इण मांय आज पेश है नौजवानां ने दीरीज्या रूजगार ऊं जुड़ी जाणकारी—

000

अंतरराष्ट्रीय आपदा जोखिम शमन दिवस आज दुनियाभर मांय मनायो जावे। ई दिवस रो मकसद दुनिया मांय ई बारा मांय जाग जगावण अर आपरा शमन संस्कृति ने बधावो देवणो है। ई साल रो मुद्दो है “उज्ज्वल भविष्य के लिए अगली पीढ़ी को सशक्त बनाना”। ओ मुद्दो नौजवानां री हिफाजत करण अर वां ने मजबूत बणावण री शिक्षा री भूमिका ने दरसावे है। इण साल शिक्षा री मार्फत टाबरा ने मजबूत बणावण माथे ध्यान दियो जावे इण रे अलावा इण रो मकसद टाबरा ने आप रा पिरवार अर समुदाय मांय बदलाव लावण अर खुद री हिफाजत करण जोग बणावणो ई है।

000

प्रदेश मांय न्यारा-न्यारा हादसा मांय एक टाबर समेत लोगां रा मौत व्हे गयी। बीकानेर जिला मांय देशनोक कने कार री टक्कर ऊं मोटरसाईकिल सवार दो मिनखा री मौत व्हे गयी। वठे ई श्रीगंगानगर जिला रा पदमपुर करे ट्रेक्टर री फेट मांय आवण ऊं एक टाबर री मौत व्हे गयी। ओ हादसो उण बगत व्ह्यो जद टाबर खेल-खेल मांय ट्रेक्टर चालू कर दियो। नीम का थाना जिला रे कने जीलो गांव मांय नहावती बगत डूब जावण री एक की मौत व्हे गयी।

000

प्रदेश मांय लारला कई दिनां ऊं बिरखा री गतिविधियां मांय कमी आवण रे पछे आज केई ठौड़ां हल्की बिरखा व्ही। बांसवाडा जिला मांय कुछ ठौड़ां एक घंटां ताई झमाझम बिरखा होवण ऊं लोगां ने तेज गर्मी ऊं आराम मिल्यो। बारां मांय तड़के संवारा सुरू व्ही बिरखा दोपहर ताई चालती री। वठे ई सवाईमाधोपुर अर करौली मांय ई छांटा-छिड़को व्ह्यो। बालोतरा मांय आज संवारां ऊं ई बादळा री आवाजाही चालती री। ई बीचे, मौसम महकमो अगूणी हवा रा असर ऊं आज अर काले दिखणाद अर दिखणाद-अगूणी राजस्थान रा जोधपुर, उदयपुर, कोटा, अजमेर, भरतपुर अर जयपुर संभाग अर आरे सारे रा हलकां मांय कठेई-कठेई मेघ गरजण रे साथै हळका ऊं मझळा दर्जा री बिरखा व्हेवण री आस है। उदयपुर अर कोटा संभागां रा कुछ भागा मांय बिरखा री गतिविधियां 15 अक्टूबर ताई चालता रहवण री आस है।

000

बाडमेर मांय जिला प्रशासन कानी ऊं नवो बाडमेर अभियान चलायो जा रह्यो है। ई अभियान रे तैत सार्वजनिक ठौड़ां री साफ-सफाई अर सौन्दर्यीकरण माथे खास जोर दियो जावे और ब्यौरो खबरनवीस ऊं—

000

जयपुर मांय एक दौड़ शूरवीरों के नाम थीम माथे प्रोमो रन रो आयोजन करी ज्यो। आ दौड़ वैशाली नगर रा विजय द्वार ऊं सुरू व्हे र गाण्डीव स्टेडियम माथे पूरण व्ही। दौड़ मांय 500 ऊं बत्ती सेना रा जवान, बुजुर्ग अर लोगां हिस्सो लियो। ई आयोजन रो मकसद सेना रा शूरवीरां रा साहस अर बलिदान रो सनमान करणो अर साथै ई फिटनेस अर स्वास्थ्य रे प्रति जाग जगावणो हो। दौड़ री सुरूआत लेफ्टिनेंट जनरल हरबिन्दर सिंह वन्द्रा प्लेग ऑफ कर ने करी। बुजुर्गां रा सनमान मांय नामी मैराथन चैम्पियन अनीता जानू ई इण आयोजन मांय हिस्सो लियो अर दौड़ाकां रो मार्गदर्शन कर्यो। प्रोमो रन रा कामयाबी पूरण आयोजन रे साथै आवता 8 दिसंबर ने होवण वाळी नामी ‘ऑनर रन’ री तैयारियां ई जोरां माथे है।

000

प्रधानमंत्री नरेन्द्र मोदी 27 अक्टूबर ने आकाशवाणी रा ‘मन की बात’ कार्यक्रम मांय आप रा विचार साझा करेला। आं ई मासिक रेडियो कार्यक्रम री 115 वी कड़ी व्हेला। सुणण वाळां ई मीना री 25 तारीख ताई टोल फ्री नम्बर 1 8 0 0 – 1 1 – 7 8 0 0 माथे कार्यक्रम रे सारू सुझाव भेज सके है। इण रे अलावा

1922 माथे मिस्ड कॉल दे र एस.एम.एस. माथे मिल्या लिंक माथे ई सुझाव भेज्या जा सके है। नरेंद्र मोदी एप अर माई जीओवी ओपन फोरम री मार्फत ऑनलाइन ई सुझाव दिया जा सके है।

00000